

# DŽEPAROŠI NE BIRAJU ŽRTVE

## Svako može postati žrtva džeparoša

Džeparoši koriste gužvu u tramvajima, trolejbusima, autobusima, pijacama, prodavnicama, bankomatima i svim mjestima gdje su veće gužve. Džeparenje u vozilima javnog gradskog prijevoza je svakodnevna pojava na području Sarajevskog Kantona. Džeparoši uglavnom rade u grupi i koriste priliku da okruže neopreznu žrtvu i izvuku novac, ukoliko nije velika gužva, oni će je sami napraviti oko žrtve koju namjeravaju džepariti. Prema Zakonu o krivičnom postupku FBiH za pokretanje procesa neophodni su čvrsti dokazi, odnosno da se džeparoš uhvati na djelu, sa otuđenim stvarima. Džeparoši džeparenje vrše tokom cijelog dana, a najaktivniji su u vrijeme špice kada se ljudi vraćaju sa posla sa posla.



## Najčešće žrtve

Na meti džeparoša uglavnom su penzioneri i ali i zaposleni ljudi. Najviše džepnih krađa se dešava od prvog do desetog u mjesecu kada su penzije i plate. Najčešći momenat koji koriste džeparoši prilikom izvršenja džepne krađe je ulaskom i izlaskom putnika iz vozila gradskog prijevoza. Uvijek rade u grupi, a organizovani su tako da jedan ili dvojica stvaraju gužvu, a treći koristi priliku za izvlačenje novčanika iz džepa, tašne ili ruksaka. Odmah nakon što izvrše džepnu krađu i uzmu vrijednosti džeparoši bacaju svaki predmet vezan za "žrtvu" i samim tim džeparenje postaje nedokazivo. U izvršenjima navedenih krivičnih djela često se pojavljuju i ženske osobe koje prose pretežno sa malim djetetom u naručju koje koriste kao "zaklon" dok ne izvrše džepnu krađu. Često koriste žargonski govor koji lica u njihovoj blizini ne razumiju.



## Profil džeparoša

Od svih profesionalnih kradljivaca džeparoš ima njarazvijeniju tehniku i najsloženiju psihologiju, izrazito profesionalnu etiku i profesionalni ponos. Nemojte da vas iznenadi, izdžepariti vas može i elegantni gospodin sa odjelom i kravatom. Također vas može izdžepariti i mlada elegantna djevojka koja vam se nameće. Izdžepariti vas može i stariji gospodin koji vam čini neku uslugu. Struktura džeparoša je veoma raznolika.

## Zato budite obazrivi i oprezni

Ukoliko dođe do džeparenja neophodno je džepnu krađu prijaviti najbližem policajcu ili policijskoj upravi. Uočite li džeparoša kako bježi pokušajte upamtiti neke detalje i njegove karakteristične tjelesne osobine.



## Korisni savjeti

Da vaš novčanik ili novac ne završi u tuđem džepu pridržavajte se sljedećeg:

- Izbjegavajte gužve, ali ako već morate da se nađete u njima budite oprezni.
- Tašne i ruksake u javnim prijevozima i gužvama ne držite na leđima nego ispred sebe.
- Provjeravajte jesu li vam tašne i ruksaci zatvoreni.
- U kafićima, restoranima i sličnim mjestima ne ostavljajte tašne i ruksake na stolu, pored sto lice, na stolici kad odlazite u "toalet" ili zbog druge potrebe.
- Budite oprezni da vam u gužvi neko ne nameće razgovor ili pomaže jer uslužna osoba može biti džeparoš.
- Ukoliko imate bankovne kartice nemojte sa sobom nositi pin brojeve.
- Nemojte sve vrijednosti nositi zajedno, odvojite novac od dokumenata.
- Ne nosite sa sobom dokumente koji vam nisu potrebni.
- Zapišite serijske brojeve mobitela i drugih predmeta koji imaju serijske brojeve.
- Izbjegavajte korištenje stražnjih džepova za držanje novčanika i dokumenata.

## Zakonska regulativa

Krivično djelo džepne krađe u KZ- u FBiH definisano je u okviru krivičnog djela krađe.

### Član 286. Krađa

(1) Ko tuđu pokretninu oduzme drugom s ciljem da njenim prisvajanjem pribavi sebi ili drugom protupravnu imovinsku korist, kaznit će se novčanom kaznom ili kaznom zatvora do tri godine.

(2) Ako je ukradena stvar male vrijednosti, a učinitelj je postupao s ciljem pribavljanja imovinske koristi takve vrijednosti, kaznit će se novčanom kaznom ili kaznom zatvora do šest mjeseci.

(3) Učinitelj krivičnog djela iz st. 1. i 2. ovog člana koji ukradenu stvar vrati oštećeniku prije nego sazna da je otkriven, može se osloboditi kazne.

